

# La vita sciöche n jüch

Le Museum Ladin „Čiastel de Tor“ invié al Tocati - Festival internazional de jüc



**La dra Daria Valentin y le diretor dl Museum Ladin Stefan Planker tratan le convègn dla domènia.**

**Cultura** - Dai 18 ai 21 de setèmber dl 2014 ti à les strades dl zènter storich de Verona fat lerch a na manifestaziun particulara. Uniuns y associazziuns da indlunch adalerch à presentè sü jüc y süa manira de fà belaita.

Nasciü é le festival dl 2003 tres n proiet dl'Associazione Giochi Antichi cun le fin da valorisé le jüch tradizional y da trasmète tradiziuns y usanzas che s'à cherié ti secui y che caraterisèia i popui a nivel mondial. Fora de na incuntada por apasionà él gnü n festival internazional che se concentrèia vigni ann sön na popolaziun particulara. Sce la ediziun dl 2013 à sciöche focus i jüc y les tradiziuns ungarejes, è chëra dl 2014 dedicada ala popolaziun messicana. Cun de vigni sort de jüc por mituns y por gragn s'à i messicans mostrè sön les plazes y sön les strades dla citè dl Venet. Dal jüch dla pelota (che recorda la vedla popolaziun di Maya) a n gröm de jüc da mèsa à la popolaziun sudamericana cuntè de süa storia, de sües tradiziuns y usanzas y de süa manira da vire.

Al festival tôlel pert associazziuns y uniuns che à ligrèza cun le jüch y che s'interessèia dla storia dl jüch. En chësc ann à incè le Museum Ladin Čiastel de Tor albü l'onur da podèi ester presènt sön

öna dles plazes veronejes cun so produt „Ladinoscop“, inventè y realisè dl 2007. Dui dis alalungia à le diretor dl Museum Stefan Planker y süa colabradèssa Anneliese Paratoni acompagnè i tröc vijitadus dl stand cun informaziuns y spligaziuns sön la realté ladina en general y sön i jüc y les poscibilitès da fà belaita plü tl menü che an incunta tla Ladinia.

A pert i tröc jüc presentà fora por les strades de Verona él la domènia ciamò gnü tignì n pice convègn, olache de plü reladus à portè dant esperiènzes ludiches de gragn y de pici, proieç che se concentrèia sön le jüch o publicaziuns che à sciöche argomènt le jüch y süa storia. La realté ladina é gnüda portada dant da Daria Valentin, auturia dl liber „La vita sciöche n jüch“, publiché dl 2007 dal Museum Ladin. Ara se trata chilò de n liber che cunta dla storia di jüc conesciüs tles valades ladines, a pié ia dai jüc por i pici mituns čina ai jüc por adulé che po se lié al monn dl sport y dl'ert plü en general.

Le festival di jüc é stè por le Museum Ladin y por la comunitè dolomitica en general na buna ocajiun da presentè süa realté n iade atramènter. Tla Ladinia nen vara nia ma de turism, de economia o de lingaz, mo incè de chertes da cartè, de chidli y de de vigni sort d'atri gais y de jüc. Odèi sciöche chisc se relazionèia o manco cun i jüc praticà da d'atres popolaziuns dl monn po desmostrè tan dlungia che an s'é o tan che an se desfarenzièia un dal ater.



**Incè le Museum Ladin à albü l'onur da podèi ester presènt sön öna dles plazes veronejes cun so produt „Ladinoscop“, inventè y realisè dl 2007.**